

四庫全書

集部

欽定四庫全書

集部

懷麓堂集卷八十三至五

詳校官監察御史_臣范衷

中書_臣劉源溥覆勘

總校官編修_臣王燕緒

校對官待詔_臣胡士震

謄錄監生_臣賈捷三

欽定四庫全書

懷麓堂集卷八十三

明 李東陽 撰

文後稿二十三

誌銘

明故資善大夫太子少保禮部尚書兼翰林院
學士贈資政大夫太子少保謚文思彭公墓誌
銘

國家置文淵閣預閣事者迄今近三十餘人其二人出
安福彭氏少保則大師文憲先生以狀元自正統末歷
天順成化凡再入前後二十年其族弟文思公以省元
在成化末始入朝閱歲得告歸又十年以病而卒顧其
歸也朝廷賜勅給驛命有司月給米四石歲給輿隸六
人其卒也贈資政大夫太子少傅賜諡賜祭及塋凡卹
典皆備其亦可謂盛哉公諱華字彥實生負異質年十
六有操故券為爭田證者衆疑未能決公從旁遽曰券

果出庚辰歲則當書未革年年號今書洪武三十三年
必偽本也坐客奇之景泰庚午舉江西鄉貢甲戌舉進
士為翰林院庶吉士文憲實奉詔蒞教事丙午與修纂
宇通志成授編修天順丁丑年奉使靖江王府修大明
一統志辛巳丁內外艱甲申憲廟即昨入侍經筵成化
乙酉考南畿鄉試丁亥英廟實錄成以纂修校正功遷
侍讀戊子克講官考京闈鄉試己丑進日講壬辰克殿
試受卷官禮部之宴文憲方讀卷仲兄彥克為儀制郎

中季弟禮舉進士皆與焉未幾擢侍讀學士攝詹事府事賜金帶乙未克讀卷官丁酉修續資治通鑑綱目成遷學士戊戌考禮部會試今上進學儲宮公首講大學尋掌院事用各薦超擢詹事辛丑復讀卷仍兼學士癸卯御製文華大訓成進諸儲宮加從二品祿甲辰復考會試有貴家子在選朱墨卷不合公黜之失志者欲甘心焉卒亦無所害乙巳勅擢吏部左侍郎仍兼學士始入閣預機務制誥冊命多其手出丙午驟得風疾上命

醫往視遣中官賜羊酒蔬米越三月公上疏辭祿不許
又三月進太子少保禮部尚書辭亦不許賜麒麟服丁
未再辭辭益懇乃得俞旨俾歸就醫藥疾已即來瀕行
又賜金綺襲衣輿疾出都城過闕門匍匐稽顙因淚下
沾臆而去道遇太皇太后徽號恩賜誥命加贈祖同升
及考按察司僉事實如其官祖妣郭妣伍妻劉繼室李
皆為夫人公卒某壽某某月某日塋于某山之原公才
識超邁而深沉嚴重人莫窺其際平居不妄語笑及辨

論古書疑義事成敗人情信不信多奇中事無分煩簡
從容應之一一及解窮計極慮者顧弗能及少承春秋
家學後病習尚牽鑿校士命題多本胡氏傳而出諸小
說久之天下翕然成風從者甚衆如南京禮部尚書謝
公綬禮部左侍郎掌國子監事林公瀚其尤顯者也每
撰講章意義懇到曰吾曹報國者庶其在此為文章嚴
整峭厲力追古作數易藁而後成於詩亦然有素菴集
行于世公夙敦孝睦事伯兄彥某及儀制甚謹禮藉公

指授累官都察院左副都御史巡撫南畿以才譽世其
家比馳書俾子勉政奉林公狀請予銘義弗克辭銘曰
公生安城文獻之邦公出彭氏詞章之宗儲英振輝公
在館閣講筵敷對史家述作謀猷納誨絲綸代言有學
有業實紹實傳珠產合浦靡藏弗淵鳳出丹穴有翬必
天公身晚達亦久云鬱公才弗施飲志而沒持所未竟
以歸造物彼蒼孔遐有感誰詰少行老還式始克終易
名有稱賜塋有封刻石紀行有銘幽宮百世之下庶其

知公

明故中奉大夫浙江布政使司左布政使李君

墓誌銘

弋陽李君文明為浙江左布政使十日卒其子鄉貢士
袞在京師自述事行請狀于左贊善費子克以請予銘
予預考禮部得君文知君舊矣既弔袞退而為銘君諱
鏡文明其字也起縣學弟子員舉鄉貢登進士第授刑
部主事遷員外郎擢岳州知府陟陝西左叅政進河南

按察使始轉浙江為布政使其在刑部訊鞠明審内存
平恕林莊敏公為尚書雅重之每有疑獄必相可否諸
司章奏會詳定乃上有貴家歸誣告民殺人君與御史
往按直其事告者抵法我黎文僖先生為吏部侍郎薦
知岳在岳鋤梗植弱闔境大治乃修廟學構倉庾築湖
堤通城陵磯以便行者民附堤為邸肆又墾其隰地為
田其利尤溥武官試署者多冒功援詔例給實授祿君
悉釐奏之朝議行天下湖江間素數盜君飭吏卒禽其

魁餘黨潰散聲益起部使交薦比去民戀戀不忍釋在
陝卹民隱禁貪暴吏部尚書三原王公恕稱其能在河
南未期月獄無留囚姦民賊吏多褫爵謫戍者巡撫都
御史陳公道亟旌之吏部擬薦為南京都御史及福建
布政使皆不果命最後乃得浙浙之人方深慶幸之而
不意其遽止也惜哉君生某月日卒某年日年六十二
某月某日塋于某山之原李氏譜傳為唐長平肅王之
後徙德興再徙弋陽曾祖諱庭椿祖諱崇素考諱守珩

累贈知府妣趙氏贈恭人配唐氏封如其姑子五某某
孫三君器度偉重厚倫誼達事體才而不伐貴而能約
守身奉法三十年猶如一日云銘曰民有二長布政按
察布者主恩察者主法同功異用鮮克脩之吁嗟李君
實堅試之法所久任觸事硯發恩未大施飲志而没人
謂君才可省可臺天實奪之豈君弗能吁嗟李君竟何
為哉

明故贈通義大夫都察院右副都御史熊公合

墓誌銘

都察院右副都御史道州熊君繡以考績恩貤賻其考
默菴公封母龍氏為太淑人太淑人方就養延綏未幾
卒繡扶喪東下留真定而躬請命于朝將歸而合葬謂
予系出湖南有宿契獲聞家教來請銘乃叙公行實附
以太淑人事并銘之按熊氏本豐城望族國朝初公祖
景賢籍戎衡州洪武末乃徙道公考諱世名往代父歸
而置產居之實生公瑄其諱也公敏而慎嗜書史更能

吟咏出遊楚粵間為奉養計家用日饒既失怙有庶弟
三人皆為娶婦二子俾經治生業繡習舉子後以經遊
嶺南至南寧道卒時維景泰甲戌某月某日公之年僅
四十而已太淑人同郡處士諱壽之女朴質不華歸于
公賓禮交至事其舅及姑余淑人曲致孝敬有從祖姑
劉氏年九十依其舅以居與公事之食飲服飾皆與姑
等下逮娣姒羣從皆有恩公出遊念母老不敢以薪米
為累則悉付太淑人太淑人一意綜制為公助劉氏之

喪公尚未返請于姑務厚塋之聞公喪哀毀幾絕遣人
運塋塋其姑如公之塋其父然訓二子慈而有則繡舉
進士授行人擢監察御史出知清豐縣進知鳳翔府歷
遷山東布政使以今官鎮延綏所至無遠近夷險皆迎
就養太淑人訓益嚴歲祿外無厚享每心安之曰兒守
官三十年如一日吾所親見他日有以白父子於地下
在延綏思其伯子經不置繡以書趣使至距屬續僅再
閱月耳時則弘治戊午正月某日太淑人之壽八十有

五矣公之喪經哭扶歸太淑人治命又與繡同受與家庭無異君子謂公夫婦曰死得其正公舊塋宜陽鄉今卜用是歲某月某日合塋于蔣居鄉君子謂兄弟曰終得其禮公孫三人曾孫一銘曰夫終嶺南婦塞北身居道途子在側胡南歸葬四祀隔方殊歲異同此宅天實為之豈人力刻銘攷行視此石墓不可毀石可泐

前直隸無為州知州楊君墓誌銘

楊君諱士深字原甫世為建安人少師贈特進光祿大夫左柱國太師文敏公之孫高祖諱達卿曾祖諱伯成皆用公貴贈少傅工部尚書兼謹身殿大學士考諱錫鄉人私謚貞素先生母詹氏君以春秋舉鄉貢為國子生登天順丁丑進士知廬之無為州州有巨猾苑姓者持官府短長又有丘姓者兄弟八人剽掠江上前守莫敢問君悉置諸法州民牧官馬折免徵糧後為增數倍而糧額如故且豪家多冒名牧者顧不免荻薪折抄輸

者亦止下戶君泣加釐正民稱為平正統己巳州民運
糧至臨濟聞兵駭散米盡失既得赦戶部猶下所司督
償捕繫滿獄君奏蠲之州有轉般糧漕流至巢縣倉往
返數百里溺者相望君奏為倉收次又奏置巡檢司歲
省羨米且免盜厄江西民多居淮興貸取息為淫刑以
脅利民畏之如虎有永新董姓者歐殺民方某又逼其
妻子焚屍以滅口君正其罪遂藉幼男女婦為所折當
以去者二百餘人達巡按御史及江西按察使而遣人

分歷諸府縣索其半而還尤善折獄情偽立辨有汪周二姓爭絕戶田八十餘年閱三巡撫二十一巡按不能決君諭以利害皆感悟曰惟命二家皆畫君像飲食必致囑焉天順甲申君以事忤巡撫坐累罷去冠服家居自號閒翁改號清菴築室黃華山作太平丘別業大夫士造訪無虛月後進子弟考德問業禮如嚴師益三十餘年而後卒年六十有四矣君重孝義樂賙貧乏外傳死卹其子幼為娶婦置產人以是多之聚書萬卷博覽

強記談古今治亂疊疊不厭為詩文典實有體會朝廷
修兩朝實錄下有司纂輯事迹郡守輒屬之君又修郡
志亦延君摠其事云君娶蘇氏子生四孫二從子旦早
失怙藉君誨迪舉進士累官吏部考功員外郎亦有文
狀君行甚悉亘請銘于予予舊與君從兄弟中書舍人
敬夫前兵部主事景奇同朝獨未識君聞君名至稔矣
近又識亘兄弟愛其才故為君銘君卒于某月日塋于
某月某日其地曰某山之原銘曰楊出建安實望文敏

君才孔優能仕能隱家有書我則讀之世有科我則續
之功施一方孰謂非試還守舊廬以畢吾志生斯葬斯
式全厥歸種德若封來者其培之

封孺人楊母墓誌銘

湖廣按察使僉事楊公元之致政歸至鄴都孺人葉氏
道卒其子春坊左中允廷和自述事狀及進士廷儀請
予銘蓋廷和與予同在翰林久廷儀適禮部所試而公
在吾藩提學事稱邦大夫可也按楊氏居成都之新都

業儒者累世矣葉亦同邑處士諱深生孺人早失怙恃
育于繼母暨兄莊重有則公及封君卒於貴州府邸伯
仲子繼沒太孺人某氏以三喪歸慎為少子擇婦曰所
以承楊氏之祀者在此故孺人歸于公家始貧孺人力
奉姑養閉戶織辟笑言不聞于鄰公之為國子生為進
士為行人司正及僉事孺人皆從其在逆旅手執炊爨
薺鹽或不繼未嘗色愠公及廷和後先舉禮部公得告
以孺人歸養太孺人目久眊忽復明謂所親曰吾子勤



學類其父吾婦勤家類其母先亡者皆不及見之天開
我老眼令看此好景耳廷和滿檢討初考孺人獨被封
寄至命冠服而藏諸笥曰不敢先吾姑也在官廨每食
異物輒停箸嘆曰吾姑未嘗此味也教諸子必厲辭色
每食後令背誦所授書曰吾以隙時課汝庶不妨本業
且使動盪揚厲不為食困夜則飲之酒以節其勞仍戒
勿多酌曰學者廢業仕者弛職皆是物也間誦小學耳
熟之家庭事有近似者必舉以為戒曰無徒以誦為也

又曰汝父少時欲學書無佳紙筆欲夜誦無膏火欲博
觀無多藏書今汝輩皆有之而一一不能如汝父何也
蓋其家政皆極詳密而子教尤諄切如此廷和歷四命
至今官直經幄兼侍皇太子講讀以文行稱于時廷平
繼舉鄉貢至廷儀復顯廷宣亦治舉子業人謂公善以
身教孺人實佐之及公乞歸復力贊其決其識見志嚮
殆非常女婦可及是雖弗克于壽而所遺者亦云裕矣
嗚呼賢哉孺人生某卒某得年六十三塋某鄉之某原

孫七人皆幼銘曰從夫子儒朝圖暮編持以教子我居
弗遷從夫子官命服在身有祿有封終嚮其勤我食
我力匪求自天若耦在耕而獲于田若織之成以歲
以年小以喻大于物則然維坤德柔乃順承乾無成
有終品物用蕃大以喻小于人有焉從夫子還藏于
故原雖老弗偕其歸則全于生有榮沒也有聞不死
者存塋以為文

封安人費母余氏墓誌銘

費母余安人訃至京師其子春坊左贊善諱宏方校士
禮闈既復命即為位制服如禮及得請終制奉其妻之
兄濮編修韶狀請予銘予奉命典試事聚處移月誠不
意其遽有此乃據狀以銘余氏出廣信鉛山譜傳為宋
叅知政事良弼之後處士允徽生安人費邑望也贈兵
部員外郎諱某與處士名輩相埒為其季子封修撰叔
玉君擇配安人以父命歸焉時兵部公既棄養冢子貢
士伯玉亦即世太宜人周以中子貴州叅議仲玉方就

學悉舉家政畀修撰君閭內事則付冢婦張以及安人
安人奉太宜人謹動求意適張有節行治內嚴甚安人
亦禮事之視其笑嚔以為憂喜于是先後長少皆奉張
教益和睦順張亦樂之志娶居之哀安人有嫁田數十
畝鄉俗必自主出納安人謂修撰君曰吾家方務孝義
吾安可私所有哉捐其租以給公費修撰君有弟妹各
二人太宜人病弗暇卹安人與張代撫之為之室家安
人素勤儉每夕家人多就寢中堂燭不滅刀尺鏗然有

聲時祀修潔賓戚燕會豐腆中度下逮臧獲皆煖飽無
弗給者其所自奉則敝衣糲食一無所擇叅議公嘗語
弘曰吾家之興蓋兵部公之志吾兄弟成之然實吾嫂
與汝母克相于內也安人生宏及完雖甚愛不以慈廢
教髫時輒縱使遊學戒勿亟歸宏領江西鄉薦試禮闈
未第留國子學者三年成化丁未舉進士第一授翰林
院編修旋以徽號恩獲受封安人不色喜居起服飾肅
然如平時修撰君性元直遇事或過激安人每從容諫

之宏既貴有挾勢為私謁者安人謂修撰君曰吾家寧
貧賤不願得此然亦宜弇却之勿以賈怨也安人本羸
後病瘡久宏憂之屢迎養弗得比復請乃許宏喜甚計
日以俟而竟弗果君子蓋悲宏之志云安人年五十六
生某卒某塋于某山之原子三人宏年二十及第今侍
皇太子講讀文學性行卓然聞于時完學舉子業窩生
十歲而夭女孫三人長許嫁宜興吳驥編修克溫子也
銘曰婦弗職廢實勤厥家母弗志溢貴莫我加榮名

峻科有子則那人有常情非情則夸賢哉安人於世
幾何山巔水涯京路孔遐就養有期而止弗來生行
死離孝子有思曷以慰之封君之悲後千百年我銘
在茲

明故光祿大夫柱國少保兼太子太傅都察院
左都御史總制陝西三邊軍務贈太傅謚襄敏
王公墓誌銘

少保兼太子太傅都察院左都御史王公之訃至自甘

州上為震悼輟視朝一日贈太傅謚襄敏給驛歸其喪
遣官諭祭命有司治塋事其子眷奉狀介其嫺友光祿
卿李公鋹請予銘辭至再弗獲乃叙而銘之公諱越字
世昌姓王氏世為大名府濬縣人少補縣學生景泰庚
午舉京闈辛未登進士第擢監察御史英廟復位見公
奏對明暢目屬之都御史寇公深性嚴急獨喜公凡諸
道奏牘必令詳定天順庚辰超擢山東按察使癸未大
同有警當道舉可為巡撫官者上以其人貌寢意在公

徵為右副都御史以行公力修廢政為攻守計邊人賴之成化改元以疾告遂至京師上命醫視疾遣中官慰問至再家居久之丁亥召署院事庚辰奉命出延綏至崖窯川擒賊四十餘人斬首加百遷左副都御史又于黃艸梁擒賊五人斬首百二十進右都御史壬辰以後往來東西路及寧夏界前後斬獲者倍之癸巳進左都御史賜蟒龍衣一襲又出延綏韓家塢斬首二百八十餘甲午加太子少保增從一品祿掌院事公言將士功

有未錄者乞移所加官祿賞之丁酉仍加太子太保進
兵部尚書兼左都御史增正一品祿庚子出大同至威
寧海亟帥兵擣之擒男婦百七十人斬首四百餘人以
大捷聞勅封威寧伯歲祿若干石仍兼都御史辛丑出
寧夏擒賊十人斬首百餘廷議文臣伯以上不得進封
加太子太傅增歲祿四百石總五軍營兵署前軍都督
府事提督團營未幾出佩將軍印克總兵官鎮大同移
鎮延綏尋罷居安陸弘治改元公上疏自列詔許還鄉

甲寅復左都御史致仕丁巳兵部言陝西三邊宜得重臣專任其事僉舉二人皆弗稱者以公對乃許之亟召至京引見勞賚恩禮殊特加太子太保總制甘肅寧夏延綏軍務鎮守巡撫而下悉聽節制公累辭不許事有未盡便者請易置之乃行至則以敵別部居賀蘭山後者數出抄掠帥兵擣之斬首百餘還所掠人畜器械甚衆上降勅獎諭加少保兼太子太傅公又言哈密為土魯番所破久弗繼近番酋引罪還所侵地宜封其故主

以守之疏上數月未報公慮泄事機焦勞過度遂成疾而卒戊午十二月一日也公姿表奇邁慷慨自評論議英發見事風生雖以文顯久膺帥寄歷西北諸鎮身經數百戰其于邊徼險易敵情真偽將士之強弱勞逸皆歷歷在胸臆每出奇取捷謀定而後發同事者亦莫測所向至于顛倒才智中自為操縱而人人欣動樂為之用效之者皆自以為不及其所見所執壯老一致雖罹挫衄而志不少衰喜獎拔士類嘗特舉御史四人為今

吏部尚書屠公瀟都御史侃公鍾南京大理寺卿楊
公守隨故僉都御史王公濬皆大顯武臣邊將出其
門者不可勝計博學多聞精極吏事判案章奏倉卒
立就兵法射藝象緯堪輿之說罔不該究為歌詩雄
邁跌宕若弗屑意多不存稿惟詩數十首板行于時
至其睦族敦舊調窮卹匱禮接卑幼如恐不及皆其
餘事也亦可謂奇偉不羣者矣公曾祖諱顯道被旌
為義民祖諱恕醫學訓科考諱顯皆嘗贈太傅威寧

伯後復贈光祿大夫柱國太子太保左都御史三氏
妣皆夫人娶孫氏贈夫人子四人長即春次時皆錦
衣衛指揮僉事次昊次吹以蔭為百戶早卒女三孫
八某某烜蔭國子生公生某月日壽七十有三己未
九月初四寔于大任之西麓從先墓也銘曰大任降
神鍾為偉人白簡廷執行臺外巡握機馭吳出禦戎
醜設奇制勝孰敢予侮崇階屢遷一品而極分符錫
號封以大國孫居南陲言歸舊鄉王事有程載趣其

裝帝曰汝能紓我西顧老弗辭難驅彼長路靈夏近郊
誓擣虎穴玉關故鎮謀計國絕勲未大成志則有餘飲
恨而沒天其鑒予文以致身武以樹績時其卷舒胡我
失得輝曦曜星躍冶之精歛風震霆擲地之聲或棄弗
試其氣勃鬱上千于霄中殷于室茫茫天津旁接雲霧
劃然一飛終返其故偉哉斯人茲物是方永閔其藏地
下之光

明追封寧國夫人墓誌銘

周太夫人高氏順天寶坻人處士諱泰之女追封奉天
翊運推誠佐理武臣特進光祿大夫右柱國太傅寧國
榮清公之繼配特進光祿大夫柱國太保慶雲侯壽特
進榮祿大夫柱國長寧伯或之母也周氏本昌平望族
榮清公初娶甄氏追封寧國夫人生二女長適同里劉
氏次聖慈仁壽太皇太后甄夫人卒時公隱弗仕博求
名家得夫人禮娶為繼夫人明淑簡靜言動不苟及歸
公恪秉婦道力綜家政漸底優裕旁逮族鄰咸稱曰宜

正統甲子太皇太后為英廟貴嬪誕生憲廟暨正儲極冊為貴妃周氏遂顯天順丁丑英廟復位召見公于便殿擢錦衣衛正千戶夫人始被封命勤儉如平時歲祀賓燕晨夕饋食必致精潔公甚賴之天順癸未公棄養壽方弱冠或甫十齡朝廷遣官治喪夫人躬視含殮凡塋祀事亦悉為規畫壽既嗣官夫人遣或就學皆自訓督俾登禮讓成化乙酉憲廟即祔尊母后位號推恩外氏擢壽為都督僉事進同知又封慶雲伯追封三代或

自正千戶累遷指揮使進都督同知封長寧伯加公贈
謚夫人亦累封焉比壽進慶雲侯加夫人為太夫人公
棄養四十年夫人壽日高恩禮日益重賚予存問殆無
虛日其子爵位隆重門閥鼎盛諸孫亦陰有祿秩夫人
每以盈滿戒之凡時節入謁太皇太后禮遇甚厚夫人
內懷感激而慎密愈加出值嫺族言不及禁中事如是
者亦三十年弘治己未十一月十一日卒距生永樂乙
未八月二十八日壽八十有五訃聞上震悼遣禮部諭

祭者十有三命工部給棺治葬戶部給米布而內出
金幣楮鏹為賻仍用夫貴追封為寧國夫人太皇太
后痛念弗釋遣中官護葬暨皇太后皇太子諸王
諸妃嬪賻祭有差公侯卿大夫以下弔祭無弗徧者
嗚呼其亦可謂極盛也已夫人母鄭氏子二孫十卜
是年十二月二十一日葬都城西鸞臺山之原從公
兆也間遣璋介張指揮翰奉狀請銘謹書恩典之
隆世行之大封錫卒葬歲月之詳又備書其婚姻

門族之盛有如此者為叙之銘銘曰周出畿望實姻
帝家倚與夫人如德之華儷美寧公元配是繼於
聖祖母惟親之懿二子繼命為侯為伯貤封所生
開此大國賜第魏莪命服有煌椒房之恩戚畹之
光禮謁三宮養隆五鼎歛厥有生歸于樂境貴富
及壽在人實艱有一而足矧惟備焉國有卹典有葬
有祭有賻有贈亦罔弗備有原西郊寧公所歸茲往
從之世永弗隳

封太恭人劉母李氏墓誌銘

劉母太恭人李氏浙江按察副使諱潔之配也以其子
戶部主事鳳儀分司就養臨清又以其孫翰林編修龍
及第就養京師未幾卒鳳儀適受代北上及視含歛將
西歸襄事以龍請予銘予今年春殿試讀卷臚傳之際
見龍才器俊偉與所陳策稱詢其世系又得其家教于
倫修撰文叙得太恭人之行于戶部郎中邵寶乃按邵
狀為叙及銘劉李皆襄垣縣望族封太恭人知河間府

諱某之女劉之祖新安教諭諱某聘為冢婦及按察為御史始封孺人後鳳儀知高密縣以治行被旌乃用夫貴加封太恭人太恭人性慧而婉通書詩大義以教諭公在外久從姑于官饋奉惟謹及公致政歸病且革偕按察侍湯藥累月不去簪珥公有庶女方七歲躬為撫鞠厚嫁之娣某氏寡而無子視若同出俾弗失所按察嗜棗餅嘗預戒俟讀誦勤苦輒出獻之夜具膏火至漏下二十刻乃已按察魁鄉貢服官政有誣告盜牛者鞠

不成獄太恭人聞之請曰此法宜緩久之乃得真盜及按察承命從都御史治荆襄流民復請曰師貴安靖幸毋妄殺為子孫地按察然其言多所撫定按察卒于官鳳儀方幼或難其歸請留居浙太恭人曰家有田廬可居有墳墓不可無主柰何相率為異域鬼乎乃歸至臨清臨清族人益留之亦不從竟得歸既襄事乃一意教子其弟欲俾鳳儀為儀賓太恭人曰此非吾願願吾子得一第以成父志足矣鳳儀繼魁鄉貢屢誦禮部竟不

為少沮意舉進士龍生五六歲能屬對復遣就學曰是
子當不後其父其言無弗驗者人謂劉氏世繼科第太
恭人有力焉其遠識定力于此亦可徵也太恭人壽七
十三生某年卒某月塋某日銘曰從夫子宮其歸孔艱
不寧厥居江濟之間有子及孫教必以正奕世科名其來
愈盛居我奠之盛我見之我享其成我實願之孫實我
養子實我塋我所從者寧不我望韓山之陽夫君所藏
終往從之來者其無忘之

懷麓堂集卷八十三

欽定四庫全書

懷麓堂集卷八十四

明 李東陽 撰

文後稿二十四

誌銘

明故光祿大夫柱國少師兼太子太師吏部尚書華蓋殿大學士贈特進左柱國太師謚文靖徐公墓誌銘

少師徐公之卒其子元楷元相具書請予銘予從公後
既辱知厚慟其亡久未忍作也踰年以葬期告乃為銘
公姓徐氏諱溥字時用學者稱為謙齋先生世居常之
宜興曾祖諱福當元季有陰德于鄉祖諱鑑國朝永樂
間累官瓊州知府民廟祀之考諱琳皆贈光祿大夫柱
國少傅兼太子太傅戶部尚書謹身殿大學士公為縣
學生景泰庚午舉南畿鄉貢甲戌廷試第三授翰林編
修予告歸天順丁丑英廟復辟命兼司經局校書侍東

宮講讀憲廟每目屬焉甲申以登極恩超擢左春坊左庶子兼侍講克經筵講官預修英廟實祿成化丁亥稽武職誥黃已丑歸省辛卯丁父憂特遣官賜祭甲午擢詹事府少詹事兼侍講學士乙未典禮部會試校閱精當所得省殿二魁皆至于大用丁酉丁母何夫人憂上賜白金楮幣及塋祭庚子擢太常寺卿兼學士數年間歷掌翰林詹事春坊司經局事蓋前此所未有者辛丑再典會試尋遷禮部左侍郎仍兼學士進退奏對皆稱

意旨援據論議有關於時甲辰知會試貢舉事以陝西
旱代祀中鎮西海河瀆諸神雨輒應丙午改吏部佐理
銓選清慎有加久之資望並積而為當道所尼憲廟有
意柄用之未果也丁未今上即昨易置內閣臣公首膺
簡任入叅機務尋擢禮部尚書兼文淵閣大學士更化
之際如止貢獻停工黜左道屏斥邪佞登用老成固
出宸斷而公之佐翊有力焉弘治戊申修憲廟實錄克
總裁官同知經筵事庚戌復出典會試三試禮闈者前

亦未之有也辛亥加太子太傅兼戶部尚書武英殿太
學士賜白金文綺襲衣廐馬又賜罪人家屬上察公篤
厚可大任旋置元僚禮遇隆重特賜無虛月公益勤輔
導制勅誥命務崇簡雅啓沃謨謀必據正議守成法見
人有才行可用極力引援寸長片善亦加甄錄至忘瑕
垢大臣有罪廢媒進者公持其議竟不得行藩府有大
獄羣議洶洶公力質其決事始定留都獄連引貴近或
為觀望亦贊成之其他事多秘密公又謹重不泄外人

無知者甲寅加少傅兼太子太傅吏部尚書謹身殿太
學士進階光祿大夫柱國賜三代誥命蓋自筮仕歷四
十餘年凡五錫命至是而極乙卯公家置義田以贍羣
族請命于朝上優詔獎答仍復徭役為世勸丁巳修大
明會典克總裁會年七十以疾在告上疏辭不許命醫
診視遣中使賜羊酒楮幣仍令風雨大寒暑免朝戊午
皇太子出閣進學加少卿兼太子太師華蓋殿太學士
尚書如故領東宮講讀事未幾公得目青命醫遣使如

前三上疏乞歸上以公累朝耆德方切倚毘屢詔慰留
最後辭益懇乃許之賜勅給驛遣官護送還鄉令有司
月給米五石歲給輿隸八人仍賜襲衣金楮特官其孫
文煥為中書舍人公卿而下賦贈祖餞皆嘆羨不能置
越明年己未九月十一日卒于正寢上聞訃震悼輟視
朝一日賜棺木米布諸物遣行人諭祭者九贈特進左
柱國太師諡文靖恩數之厚殆世之所僅見云公風采
凝重言動有則而溫然可親事親孝謹居喪甫廬墓側

有白鳩白雁之異與羣從叔弟情義周洽親舊有急則
周之處官恭慎事值勞錯每從容應之皆中理會及當
端揆決衆疑未始有疾言怒氣而卒以大定德量弘裕
或遭橫逆人不堪其難而含忍茹納不見形迹故大夫
士無疏戚遠近皆飲德沾惠終其身無怨懟者若其引
身避位斷斷不移卒之名節不虧恩卷無斃嶷然為一
代名臣考其終始亦可以無愧憾矣公博古多識為詩
清潤有思致文必根理道四方購乞碑板相繼有謙齋

集若干卷尤好表章先賢同邑有吳尚書雲洪武間死
事雲南事久湮沒公言于守臣奏之朝賜謚贈官歲致
祭焉公生某日壽七十有二某月日葬瑞雲山配杜夫
人早卒繼李夫人先卒賜塋于是今祔焉公四子長元
楷義授都指揮同知次元概恩授中書舍人亦卒狀乃
公甥吳編修儼所著其事尤詳今擬其大者如此銘曰
瑞雲山高荆水清元氣下結扶輿精公居大史官列卿
文章作綿禮作經入掌帝制持邦衡補袞五色山龍形

廟堂高居坐不傾一朝令出民弗驚調齊甘苦成和羹
四方士類歸陶型悉遣衿佩為冠纓尺量寸度桶與臬
大者梁棟當明廷公心不倦亦不矜盡弭怨謗銷讒爭
功成身退古有恒公歸自保哲且明君寵極重臣身輕
翩然乘風逝高冥山迎水溪如平生骨肉歸後魂上征
天為萬古還英靈此山此水仍茲銘後千百年乃其徵
明故嘉議大夫禮部右侍郎兼翰林院學士贈
禮部尚書汪公墓誌銘

予與公先後入翰林繼掌院事周旋幾四十年間公卒
既往弔哭其諸孤介其門生沈編修燾吳編修一鵬請
予銘按公狀公姓汪氏諱諧字伯諧其先本浙之餘姚
祖仲仁徙仁和有醫名考士淵舉鄉貢嘗為監察御史
後贈翰林編修妣褚氏封太孺人御史公為望江訓導
實生公徙居京師弱冠而孤能銳意問學聲動場屋以
春秋舉天順庚辰進士簡入翰林為庶吉士壬午授編
修丙戌同考禮部會試丁亥英廟實錄成以纂修功遷

修撰賜晏及白金文綺襲衣丙申滿考擢右春坊右諭
德丁酉續資治通鑑綱目成進右庶子戊戌侍今上講
讀于東宮己亥以母艱去壬寅復任丙午典南畿鄉試
丁未奉詔授翰林庶吉士業是年上即阼以侍從恩擢
詹事府少詹事兼翰林侍講學士弘治戊申開經筵承
勅充講官庚戌典禮部會試時方修憲后實錄為副總
裁辛亥疾作在告三月上疏請停俸給不許每時節珍
味即賜于家書成勅陞禮部右侍郎兼學士階嘉議大

夫賜賚尤厚壬子復上疏辭乃許之仍詔疾愈當復用
自是獨處一室右臂猶持杯作書間為文以應購者皆
不失常度越九年年六十八疾革遂不起特贈禮部尚
書遣官諭祭仍給驛歸其喪命有司營葬事云公娶章
氏贈孺人三子長登以恩肄字中書將授官次舉舉順
天府鄉貢次賜府學生女二長適天津衛指揮僉事修
勲孫三某某女孫二公生某日卒以己未初度前一
日塋以某月某日墓在仁和某山之原公簡重寡言笑

儀度整潔博奕音樂皆絕不好事母孝當家中哀力共
甘旨竟貽祿養喪居枕塊得脾疾終其身與人恭孫嫻
友有急輒加賙貸漢陽知縣蔡洪濟客死時卹其孤教
弟箴舉進士為金壇知縣博涉彊記尤邃于經學門上
士經指授多取科第山東布政使王沂陝西行大僕寺
卿徐佑其顯者鑒閱精審每與試事輒稱得人所著古
文歌詩醞藉有法有寅軒集若干卷藏于家慮事周悉
晚益慎密雖居官久不涉世務優游鉛槧間為疾疢所

困卒以自老論者蓋多惜之然在告而遷秩生而蔭子
身沒而贈官給驛聖天子優禮文學侍從之恩出乎常
格非公之賢亦曷克致之公無憾哉銘曰維浙西東山
清水竒文獻之邦兮公生南畿宦遊北都沒而歸其
鄉兮公在累朝史局經緯校文塲兮為名侍臣為
能史官亦惟主司之良兮穹階顯曹渙號下頒表幽
堂兮有銘在茲公名孔彰雖千百世其勿忘兮

明故通政使司右叅議致仕進階朝列大夫趙

先生墓誌銘

東陽入仕三紀餘都邑耆舊凋落殆盡休居遐壽惟竹溪先生一人歲時造訪輒留坐欸語談本朝故事及諸先生之遺風餘跡漸弗能出比者始以壽而終春秋蓋八十矣既聞訃數日其子竝奉南京兵科給事中倪君天民狀來請銘嗚呼是安可辭哉先生姓趙氏諱昂字伯顥竹溪其所自號也舉正統甲子鄉貢登乙丑進士第觀吏部政授中書舍人有名直內閣領文臣誥勅事

戊辰禮部會試充掌卷官己巳丁母憂景泰庚午起復
修歷代君鑒壬申兼司經局正字書成賜金織文綺甲
戌以歲旱代祀淮瀆乙亥修橐宇通志丙子成復賜金
幣權翰林院編修天順丁丑英廟復辟超擢通政使司
右叅議督武官誥黃尋充蜀府冊封正使其所領多文
翰禮儀事餘無所見也甲申憲皇即阼出為瑞州府同
知至則勞撫字勤綜理所屬學校尤加意課勸藩臬部
使未嘗更視然必稱之曰能丙戌丁繼母憂歸己丑服

闕顧其志已倦乃上疏乞休命復舊官致仕自是脫屣榮利放意詩酒間雖處城市不異林壑燕游登眺惟意所適京府鄉飲禮置賓席亦歲赴焉丁未今天子登極詔進階朝列大夫其卒以庚申九月十日十月十日葬都城東安德鄉之原先生本鳳陽壽州世族曾祖諱達洪武初授燕山護衛百戶祖諱清永樂初遷常山護衛正千戶父諱傑嗣其官後贈通政司右叅議母張氏累贈宜人子五翊舉鄉貢知宿松縣卒竝舉進士歷刑科

都給事中為光祿寺少卿靖鴻臚寺序班次立次貯先生風神朗徹性度寬裕百物無忤居家事上卹下務敦恩意親黨雖疏遠必致情愛閭里道路雖幼且賤亦加禮接慶弔問遺舉無違闕解紛拯難常若不及然公卿大夫及勲戚貴胄罔不愛慕父喪致客千人仕雖未達而姓字甚著童兒隸卒皆稱為趙伯顯先生無異辭尤博涉羣籍苦吟咏工書翰所著有貽安叢桂二集竹溪小稿若干卷諸子弟多家學踵科第取官秩而光祿君

最顯其名位蓋未艾云為之銘曰鄉有耆宿國有舊臣
博學多聞吾見其人閱歷累朝跋涉萬里出領民社入
掌文史若馳康莊中道顛踣終息其駕老有餘力竹居
溪遊比晉逸民所不同者遭明盛辰歛厥榮名歸于壽
境有身歸全得止而瞑生長王都没藏近郊有樹在封
百世弗凋

明故亞中大夫貴州布政司左叅議汪君墓誌
銘

叅政汪君既舉成化乙未進士其子工部郎中俱舉辛丑翰林院編修俊舉弘治癸丑檢討偉舉丙辰國子生佃舉戊午鄉貢皆出君教衣冠甲第之盛士大夫蓋侈言之比俱以病歸卒于途越六日而君卒聞者又相與哀之曰汪君固止是哉公諱鳳字天瑞初命為南京刑部主事歷員外郎郎中精鍊法律然慎不輕決每大寒暑獄囚多瘐死君謹掃滌時食飲又慮重囚苦齧鼠特為畜猫自是死者絕少尚書雅重君諸司章奏必令叅

定乃上問章便宜疏亦以屬之值詔例薦可任布政按察不果擢擢漳州知府君聞有羣盜勢甚劇過郡不至家而去時上官欲以叛聞因大發兵為功賞計君曰是不足動衆可撫定也乃揭榜要路諭賊禍福賊感悟多散去徐引兵蹙之果就擒滅初民欲入城避賊君曰是自為亂耳亟止之不易市集竟亦無他繼又新學宮及諸公署徙獄近府君作捍海石隄治諸屬邑水利民大稱便立保甲法盜無所於匿郡境有畬人野處山谷君

槩加撫賑皆聽約束或詣庭求直民有訟不直者誣奏
及君復下君理分獲重譴君不施笞掠以理折之其人
愧服此二事尤人所難者君既抱才器高自負許不帖
帖為人下坐是忤物為有司所裁弗克自盡居六七年
意忽忽不樂將棄官歸始擢貴州左叅政道延平得熱
疾昇至家半月遂不起是為庚申八月十六日年五十
九而已君魁岸閎闊善論議少治經學多所自得有司
錄其文以傳尤識當代典故其教子用家業不求外傳

俱稱能官俊奇于文且有識操偉亦然其為庶吉士皆在予門予用是徵君之教為多君在郡督諸生躬為啓迪皆以為聞所未聞亦師事云君之先出越國公華元自婺源徙貴溪高祖祿卿徙弋陽入國朝遂定居焉祖志福舉永樂庚午鄉貢歷岷府教授以高郵州吏目致仕考仲端累贈南京刑部郎中母胡氏封宜人娶祝封宜人賢明有內行子八俱其長次佐早卒次佑俊偉佃又次代侑側室董出孫六曾孫一某俊偉歸卜明年辛

酉某月某日葬君於某山之原奉其友羅編修允升狀
請予銘乃為作銘銘曰胡為郡而不輒遷胡為藩而弗
少延咎不我執其歸則天有子斯賢又誰使然彼考祥
者舍是其奚觀乎

兒子兆先墓誌銘

嗟乎天哉予不德不能延續我祖父之遺慶積罪稔戾
以貽禍于吾子之一身荼毒之餘痛自尋省求其端而
不可得也意者蚤竊科第為顯官生長都邑不識離別

安居飽食寡積而厚享之故歟其或起自貧賤過膺廩
祿徒以肥其身饜飫其家人而戚黨窮乏傍觀坐視不
能推以濟之耶抑身叅鈞軸以來有身不能委見賢而
不能舉民窮人困而不能救以負聖天子倚任之重所
謂能薄而受上賞者宜乎其然也不然則髫年而喪母
中道而失怙三弟既夭四男皆殤是亦甚矣而才如吾
子又俾其不壽以死天道之仁覆而下閔者苟有一德
片善亦將矜而贖之矧吾祖父之純孝陰德比之國法

亦當十世以宥而忍使其後嗣凋落至此極哉吾子兆
先年十八而應試提學張御史西銘奇之比入院病跌
而止二十一復試不售以蔭為國子生二十四三試同
試者傳誦其文期必得魁解偶誤寫題字卷不得錄今
年二十七試期且迫忽病作小愈再病再作遂不起然
予以盛滿屢思引退兆先能不予撓當其志識所到雖
展脫以從亦無難者乃使之而不遂以死嗚呼尚忍言
哉尚忍言哉兆先幼習經義輒能作老成語既乃嗜古

作予見所撰述心頗怪之會檢蘇老泉集不得久乃知為所竊字字已漫矣蓋自是文思驟發諸老先生見必駭異曰是故得外祖風格後當有大名于世外祖者蒙泉岳翁也其為歌詩尤稱自得于古人朴雅簡澹言語所不及獨深領解有手舞足蹈意于是不假梯級徑趨高峻予當其年實未嘗造詣至此也顧牽縶舉業往往為予所禁不得肆間有應荅或為人促迫寸楮片札多不存稿故予亦不能盡見惟歸妹闕里有東行稿成帙

既病猶手書寄友二首其沒也其友誦之又相與輯其遺詩文得二百餘篇夫苟知其止此盍使之脫棄舉業盡力千古之文縱其所之亦足以一遂其志而竟莫之遂以死也可勝恨哉兆先生四月喪其母岳宜人鞠于繼祖母麻太夫人及長暨其婦潘氏曲致孝敬事繼母朱夫人初無間言撫二從弟延蕃皆有恩遇祖母劉大夫人前母劉夫人之黨暨諸姍戚情禮周治朋輩聚處每懷謙抑未嘗有挾值有窘急必有周卹或先行而後

告沒之日朝士大夫及都邑鄰里無問識不識咸為嗟
悼有泣下者下逮胥隸亦慟哭不能置嗟乎兒何以得
此于人哉病少間嘗謂人曰吾且殆獨念吾父之為人
寧有是吾亦未嘗自絕于天二者無所據吾且不死續
未屬以手拊髀猶隱隱有英氣察其情重傷吾意故不
忍言死蓋其平居婉孌承志者固如此至死不亂耳嗟
乎天其或者以吾祖吾父之故後事未可知而死者不
可作矣慟哉兆先之冠今宗伯體齋傅先生為賓字之

曰徵伯其生以成化乙未六月二十一日沒以弘治辛酉閏七月二十五日葬以某月某日其壙在都城西小西門祖資政府君墓側生女一尚未晬予方值秋丁奉命代視以喪告朝特遣中官賜賻白金五十兩所以慰諭者甚至實異數也嗚呼兒不顯乃獲上厪天子之寵以為身後榮使其有知亦可以少慰也夫子少子兆同之殤兆先實趣予為銘及其沒之七日夢我以碧牋烏絲欄乞書小楷曰欲於雪下觀之嗚呼兒果不死以

為其弟者望我耶予慟甚不能執筆其婦翁內翰西屏
潘先生投淚謂予曰銘不作兒目不瞑予乃飲泣為銘
自書之以寓予哀云銘曰父子之恩豈賢則親吾弗子
之傷而痛其人嗚呼天哉吾不能庇汝之身而慰汝以
文吾子其有聞乎

明故資德大夫正治上卿太子少保吏部尚書
贈榮祿大夫少保諡文毅倪公墓誌銘

公姓倪氏世居杭之錢塘高祖諱啓國初徙應天之上

元曾祖諱德潤祖諱子安皆累贈資善大夫南京禮部尚書考諱謙累官南京禮部尚書贈太子少保諡文僖妣姚氏繼郭氏皆贈夫人初文僖公代祀北岳姚夫人感異夢遂生公因名曰岳字舜咨公體貌豐碩目光炯炯望之如神人少有高識年十一見群吏將赴部試鉞出獄辭試之第其高下已而果然文僖為翰林學士典京闈試事拒勢家請託為所中謫戍萬全公為都司學生內受家學習聞先朝典故恒究心天下事舉天順甲

申進士被簡入翰林為庶吉士諸先輩奇之曰此公輔器也授編修預修英廟實祿加從六品俸文僖致仕而南公予告省覲還秩滿進侍讀加俸從五品直講經筵音吐洪暢義歸于正憲廟每目屬焉文僖疾再乞歸省因得終制暨今上為皇太子出閣進學預修文華大訓進學士侍東宮講讀在翰林者二十年同考禮部及試京闈再執文柄校閱明當得名士為多擢禮部右侍郎今上即阼遷左侍郎進尚書在禮部者十三年儀文制

度多所擬定其大者若皇太后上徽號皇太子婚諸王
冠憲廟大喪而太廟祧祫議母后奉慈殿制皆前所未
有親耕籍田視大學皆以職事從他如草淫祀正神號
禁齋醮止召胡僧請却西域貢獅諸疏皆其手出累知
貢舉往往於舊法加新意遂不可易尤喜斷大事每廷
議羣疑不能決輒用片語折之無不帖服凡四方災異
歲一再類奏加以箴諫得大臣體南京叅贊機務官闕
廷薦公上留不釋未幾忽有南京吏部之命加太子少

保以行奉詔考庶官甄別惟允叅贊再缺改兵部時留
務齟齬公秉正達變不激不隨百廢頓舉兵民皆恃以
為命吏部闕尚書上選於衆特召公至則釐正品類獎
恬抑躁不卹恩怨正色盛氣人莫敢干以私除目下必
翕然稱快天下想聞其風采每率諸曹會奏如講學修
德敬天法祖節宗室汰冗員闢異端前後數十事皆切
治道甫踰年偶趨朝急動氣成疾疾且亟猶手書薦稿
既殆強索筆書平生公正無偏私數語字隱隱可識竟

不及家事為尚書歷兩京四部去一部其屬必眷慕不
忍別卒之日自公卿下及百執事交口痛悼有失聲者
嗚呼天生一世之才問有恢闊博大傑特而絕出者蓋
不數見此其人之用舍存沒必關氣數係家國非群生
旅喪者比公文學行業大用于時而卒弗克究以沒獨
非天哉然公以父子為史官為學士為大宗伯本朝所
僅見以禮部兼講官實出親命歲時所賜若金幣襲衣
諸珍物疾則賜牲酒蔬米命醫診治辭免則溫詔慰留

訃聞則賜寶鏐萬貫遣禮部諭祭者四勅有司治葬仍
給驛歸其喪贈榮祿大夫少保諡文毅官其子為中書
舍人遭際之盛終始極備亦可謂無遺憾已公娶盧氏
湖廣布政司使雍之女有才慧贈夫人生子孝而天公
以弟工部郎中阜之子霽為後今為中書者是也公生
某月日卒某月日年五十八阜請護喪歸卜某年某月
日葬于某山之原啓盧孺人之窀自新亭來祔公嚴重
剛毅而表裏洞達即之溫然可親性至孝父難時匍匐

求解居喪哀毀踰度以舊業讓諸叔弟弟阜及山澤皆
所教育澤亦為中書舍人篤念舊故鄉黨貧乏蒙賑卹
者多至不可數雖奕世貴顯囊無餘資為文章平正
達氣象偉然所著有青谿稿若干卷與文僖集並行于
世予與公同舉進士又同官久為知己固將為天下勸
而後及吾私乃據吏部侍郎王公濟之所著狀為銘而
狀所不載者則互相發云銘曰俛以國氏派出鍾阜公
生北鄙若麟鳳在數踵接科第繼踐台斗家非世卿官

所自取若玉在崑產固其有為文章宗為經濟手若錦
在織若鐘應叩庭充廟薦若商彝周卣暨掌天曹為百
僚首若鏡在懸鑒物妍醜若鉏在田務拔稂莠拒扞疆
禦鎮定紛操若虎虎豹山藜藿為守若駕堅載重驅疾
以走苟非其才踣若十九古亦有言君子大受用而弗
終抑又難咎旂常竹帛公可不朽擬德弗工蒙物為偶
我銘在茲以慰良友

明故資政大夫南京工部尚書致仕蕭公墓誌

銘

公姓蕭氏諱禎字彥祥舉進士歷官南京刑部主事員外郎擢湖廣按察司僉事歷副使按察使遷河南左布政使擢都察院右副都御史巡撫陝西入為南京工部右侍郎轉刑部工部尚書皆在南京以老乞致仕詔給驛歸令有司月給米二石歲給輿隸四人年七十卒朝廷遣官諭祭營葬事制也按公之先居江西其府曰吉安縣曰泰和里曰瀘源後徙龍陂自宋迄今十有一世

其祖諱維翰考諱楚紳皆累贈資政大夫南京工部尚書祖妣袁氏妣羅氏贈夫人公少學詩經舉子業有名以族籍應四川鄉試有鄉人為御史引嫌不卒試蜀士多從之游叙州知府楊德敷其中表叔也諷屬縣以明經薦迫之行不就而去天順己卯以儒士舉江西其舉進士在甲申為刑部在成化年間精核法律內持平恕尚書每有擬斷必詢之其為按察決獄如流庭無留案訟者爭赴愬之無不帖民俗有嫁娶違時者力為禁

草征苗之捷實督餉以從衆欲以婦女冒首功誘所親
先致以覘其意不得乃已以加從四品祿督造王府經
制有節官校肆虐者白而治之民恃以不擾又以其餘
興廢起敝如學校廨舍津梁之類多所修葺都御史屢
旌其能以僉事滿去民皆戀慕再至輒喜而相為賀其
為都御史在弘治更化陝大飢死徙相繼區處安輯
多復故業芻粟茶鹽以至城塹器械必加之意錄重辟
若干人將官坐失律者執不貸回紇內徙者四出剗掠

督所部剽滅之有寶鏹文綺之賜其為侍郎尚書歷二部在工部務節財裕民郊廟陵寢有工役多奉命代祀其請老上特降優詔稱其勤慎令善調攝以副委任累上乃許其卒以弘治辛酉三月十六日距其生宣德壬子三月八日其葬以明年壬戌某月某日其地曰杞塘之原在祖墓之右配周氏封夫人無子以仲兄彥清子弼為後弼亦以兄顯之子益為後生子曰善公為人重厚不浮而明足應物尤敦孝義少喪父其母多與之田

母卒即焚舊券惟前母兄是聽得束修輒散諸族既貴
則遷葬考妣修曾叔祖志翁之墓構祠堂置田以供祀
事雖歷官久舊廬服飾無大增拓其賢如此所著有寅
菴稿藏于家予與公同舉進士知其賢其官湖南尤久
且著故知之特詳其沒也實悼嘆不能置乃因弼請按
工部侍郎張公時達狀為銘以納諸壙中銘曰業不肄
黌校學則一經身不辟州縣官則六卿非其人孰與有
成不覆于盈不蹶于行以保此令名載稽始終以不泯

金匱要略卷八十四
厥生惟茲銘

明故資政大夫太子少保戶部尚書贈太子太保葉君墓誌銘

太子少保戶部尚書葉公既寢疾遺命其家欲得予銘蓋予公從子副都御史贇同年進士且與公同朝久知公賢故也訃至之明日贇弟宏奉戶部尚書呂公大器狀來請予以公意不復辭按狀公諱淇字本清其先金華人自宋宰相衡為宦族曾祖諱顯以詩名世所傳樵

雲獨唱者也祖諱士廉國初戍淮安考諱雍皆以公貴
贈資政大夫太子少保戶部尚書公生而長身修髯見
者知為偉器景泰間登進士第拜監察御史天順間坐
累出知武涉縣連丁內外艱改清江寶坻皆有惠政成
化初用太僕卿張公諫薦超擢廣東按察僉事南丹土
官侵掠鄰邑公躬為撫定城柳城洛容以遏流賊蓄水
通粟以濟饑民賊復據南寧奉詔督捕擒其首惡荔浦
賊甚熾承都御史朱公英檄勦平之賜綺帛各二匹時

俘一男甫七歲及再以内艱去朱公道遣一俘婦曰公
功久未報以此為薪水具公詢之即兒母也乃以配園
丁劉氏改山東遷陝西副使領岷州兵脩潘松蕃賊久
為邊患公至則以兵俘之又會兵勦洮州賊斬首甚衆
擢河南按察使尋拜都察院左僉都御史巡撫山西兼
督雁門諸關歲屢歉發廩賑卹所活不可勝紀垣曲流
民嘯聚至數千督有司撫之亂竟不作調大同兼贊理
軍務請設井坪千戶所又增築諸堡減加徵州數罷土

兵戍邊之不便者今上即阼召入為戶部右侍郎轉左
侍郎進尚書加太子少保或請設三司于鄖陽府公以
非舊制寢不行有姦民獻大名川地為皇莊貴臣主之
牢不可解公用羣議卒歸于官哈密夷為土魯番所陷
守臣請暫給廩食處之內地公曰是自貽患也遂弗給
中帑告乏公議折鈔錢清舡料起存積及王府田租從
有司徵納以省清擾其額外陳乞者後先相繼多據理
止之間以疾告上命醫診視遣中官禮問于家小愈輒

力起視事比再作具疏乞休優詔賜許給驛歸其鄉卒
時年九十有六是維弘治辛酉八月四日朝廷遣官諭
祭命有司營葬如制而特贈為太子太保益異數云公
亮直無偽言論灑然每事持大體不務瑣屑初仕連蹇
自為縣以至臬司回翔二十年以內憲領鎮鎮又數年
久在外服皆能稱事舉職今天子更化之初陟曹省及
為尚書愈自奮勵中有操持不奪權勢章表剴切皆憂
民愛國語此予所及知者其詳則皆狀所云也嗟夫宦

成官退乃世恒情公晚得大位益能殫心力著聲績願
有加于昔者雖幾先斂退未竟厥施而其間自見亦豈
不偉哉公配何氏贈夫人子一名曰貢授國子生早卒
孫男一曰木以公蔭為國子生公墓在清江南之原以
卒之明年壬戌某月某日葬何夫人先窆于此因祔焉
銘曰長淮湯湯公居其陽仕也有歸沒也有藏東充西
秦比徼南荒出領民社入躋廟廊兵食之計功名之場
為身孔艱道沮且長卒棄其勞以佚自將壽本天畀人

謀實良公有舊墓其封若堂是曰大歸終無毀傷贈秩
賜葬于前有光榮名煥章道路是望百世之下尚書之
鄉

懷麓堂集卷八十四

欽定四庫全書

懷麓堂集卷八十五

明 李東陽 撰

丈後稿二十五

誌銘

明故資政大夫南京工部尚書贈太子少保謚
大僖董公墓誌銘

今天子右文圖治每軫念舊學侍從之臣倪文毅傳丈

穆二公卹典特異比董大僖公訃間命有司祭塋如制而特贈為太子少保大僖其賜謚也按董氏世居贛之寧都曾祖諱子平隱于鄉祖諱吉義贈南京禮部右侍郎考諱時謙累贈翰林院編修右春坊右庶子而加贈如其祖妣某氏贈淑人妣溫氏封太孺人贈宜人加贈亦如之公諱越字尚矩生五歲失怙為母氏所鞠及弱冠極力供養以其暇學舉子業補府學生生天順己卯舉鄉貢試禮部輒不利卒業國監攻苦力學雖敝巾垢服

名隱隱起儕輩間成化己丑進士及第初命為編修乙未戊戌皆同考禮部時稱得人丁內艱歸用禮襄事舉先世舊業讓其兄睦處宗鄙不以貴加人人無間疎戚貴賤皆樂與之親有訟者懷金以請笑而却之亦不怨也九載考最進侍讀癸卯典京闈鄉試甲辰值東宮講讀丁未充經筵講官尋以登極恩進右庶子兼侍讀會朝廷頒朔于朝鮮特命公奉使賜麒麟服以行至則宣德意正王度餽贈無所受居三日而還乃作賦以紀國

俗他所題詠尤多國人鋟諸梓以傳弘治己酉典試南畿辛亥修憲宗寔錄成擢太常少卿兼侍講學士壬子進日講敷奏明暢義歸于正上每為注聽久之賚與尤數癸丑擢南京禮部右侍郎公博古典習間本朝故事而職務清簡無由自見大夫士議禮者多取決焉三年考績京師時其子天錫已舉進士留累月乃去拜南京工部尚書凡上供服器藩王張其暨都城內外土木之費日旁午不絕公應之綽然有餘平生為文章歌詩典

雅優裕無煩雕琢至是尤不廢著述積所得為圭峰稿若干卷壬戌七月五日以疾卒詎其生宣德辛亥二月十六日壽七十有三薨以癸亥某月日其地曰某山之原娶溫氏母族也世有內行子四長天叙賜冠服其次為天錫又次天穀以蔭為國子生天申縣生生公脩眉長身骨格清臍雄談健步老益強力而性行恒固量度優遠識者謂為壽考之相不意其遽至此然較諸恒筭所及亦已多矣矧子姓蕃衍其賢且貴若天錫者又克

肖如此哉予與公同在翰林同校國史直講筵相視甚厚比有哭子之戚公屢致弔慰訃至之後蓋由有遺音焉天錫以治命請予為銘其狀則南京戶部侍郎鄭公廷綱所著也銘曰謂成之艱久若易然東隅桑榆惟公有焉謂壽之縣而不具延坦途摧車抑又誰愆虧盈益謙天道則有栽培傾覆人所自取數或弗值理則可守其所未竟以遺爾後古有論世匪祿壽為公則令聞如璋如珪亦有良嗣為裘為箕公無憾哉

公世在茲

明故通議大夫刑部左侍郎張君墓誌銘

刑部左侍郎張君諱錦字尚綱系出河南太康籍子岷游于秦安卒于華將塋于秦皆陝地蓋張氏居太康已久自君高祖諱敬仕元為叅知政事防禦廊延在國初以卒戍故居岷至君為五世君在秦安為縣學生岷為衛學生其居華以謝病故其歸岷以治命而塋則朝廷所命有司所治也君舉成化乙酉鄉貢己丑進士試政

刑部見稱為才有富民坐法當死權貴請貸不得則與執政者構君君欲發其姦乃已署山東司主事署員外郎鞠訊明審錄囚山東平反甚衆署郎中事益精明決獄無滯因會他司失官金尚書屬君按之疑主吏鞠之不承遣人紹其家得金示之遂服罪畿郡災君用廷薦往賑先條奏便利至則平糴勸貸分遣良吏饘丐乞舉嫁娶掩骼埋胔游惰者給牛種督之耕築行塘隄千二百丈以定水患所活不可勝紀有邏校誣棗陽武邑二

縣民為盜皆據理直之方山慶成二王府有大獄奉命
往治遷大理右寺丞再奉命治岷襄二府獄情罪皆協
累遷右少卿憲廟知名鳳陽有重獄特命之往今上即
祚時為都察院右副都御史巡撫宣府直枉除弊兵民
畏服劾罷中官武將之守脩不職者間登陴望見武帥
家假山甚麗怪之其家聞之遂自撤去邊報猝至或欲
請官軍適朝廷遣中使就議公附奏以為不必遣竟亦
無他請立萬全左衛龍門所學置天下武學歲貢額皆

舊所未脩也丁父憂服闋巡撫保定諸府兼督紫荆諸關未行遷官再勘陰陽府獄有貴臣為都御史秦公紘所劾賊以萬數怙勢求免公卒正其法丁繼母憂服再闕方復任未幾遽疾作辭俸不許乃請告特給驛歸且令病愈有司以聞其為上所簡任如此其卒也特令翰林為文遣有司即其家祭之公少有異質生窮邊無師友從釋氏學旋習老子又讀儒書始盡去舊習獨冠儒冠不避譁笑攻苦力學竟以所得取高第鄉之以儒顯

者自公始其為人敦孝友重廉節早失恃事父甚謹撫諸弟無間言閭窮赴急或假貸為賑卹其在官勤政強幹不為事窘章奏明暢動數千百言久典刑獄尤精法比而能以寬恕將之服念懇愍每至驗諸夢寐歷佐臺省前後十五年資望俱積而不及大拜以沒論者蓋深惜之然其所自立亦可謂卓犖不羣者矣所著有松壑小稿宣政錄張氏宗譜若干卷藏于家公生于某年月某日卒于某年月日年六十二歲葬

于壬戌某月日其地曰某山之原祖諱文信考諱善昏
贈通議大夫都察院右副都御史祖妣陳氏妣趙氏
皆贈淑人配劉氏封淑人有內助子四潛其長也舉進
士為戶部主事以學業世其家孫一之槩公以予嘗
與試事相視殊厚又遺潛受學于予故潛請予銘狀
則按察副使王應韶所著應韶守岷聞其父老言公
事甚悉予叅以舊所知無弗合者悼而為之銘銘曰
經律並用中古已然同功異途兼之實難公階賢科式

司邦臬載叅廷平獨秉憲節入躋省地在六卿列情法
並濟羣疑百結游刃其間有用無缺既試之繁亦任之
久為省為臺公所固有而終弗然抑又誰咎少鮮更事
老多怠成此人之恒豈惟彼刑有賢若公孰虧厥盈天
實為之非人弗能人孰不亡公有遺名有論公世盍徵
吾銘

贈太子太保鎮遠侯顧公合墓墓誌銘

公姓顧氏諱玘字文度其先出長沙湘潭元季遷揚之

江都世有宦籍曾祖諱成歷事太祖太宗仁宗三朝累
功至奉天翊衛推誠宣力武臣特進榮祿大夫柱國後
軍都督府右都督鎮遠侯追封夏國公謚武毅祖諱統
普定衛指揮使早卒贈太子太保鎮遠侯考諱興祖嗣
侯鎮貴州入掌右軍都督府事總神機營領南京留務
勲望甚著加贈太子太保嫡母王氏母魯氏皆封太夫
人公生有異質博涉書史尤閑武畧每閱古將傳輒感
慨自許期立功萬里外與兄翰相友愛翰當嗣而卒其

子嗣侯又卒公以次宗當嗣又輒卒年四十有二而已
公為人性度謹順服食儉節而喜接士大夫游宴終日
雖費無少忤及鄉黨有急則周之貸弗能償者不責也
人謂其習養素善使仕有官守必能撫卹士卒得其死
力而竟弗及用以沒至于今惜之配太夫人韓氏濬陽
衛指揮勇之女婉孌有則既歸公賓禮交至每佐公治
甘脆曲致孝養遇妯娌無間言生子溥及淵以其少孤
嚴示教戒晚總家政內外截截減獲數百指皆受職聽

令而飲被恩德無弗給者溥既嗣侯始獲以其官贈公而太夫人封焉比鎮湖廣太夫人寔就祿養每一服一食必嘆曰此君賜也汝父弗逮吾與汝共饗之汝不可不圖報稱若是者屢屢言之溥以貴州征蠻功加太子太保增給歲祿再貤錫命時武臣加保傅無追贈例僅一再見耳久之溥被召入掌中軍都督府事總十二營兼督三千營軍務踰年太夫人年六十有五而卒論者謂太夫人代終祿後克成有家質諸其夫可以無愧而公

之賢于此又可徵已溥以母喪哀上予假一月且賜賻米布遣官禮諭祭令有司營葬域于是公之墓兆品數始得如制溥復具疏乞扶柩治葬上以兵戎重務不欲俾去左右特慰留之而遣其弟洲給驛以行時洲為錦衣衛千戶其行也亦異數云溥念公葬未有銘茲奉兵部何員外孟春狀請予銘予以成國朱公輔之故與有姻連知侯清慎有猷畧足稱賢將因獲聞公及夫人之德稔矣乃并為銘公生某年月日卒某年月日葬于某

月某日太夫人生某年月日卒某年月日某月某日合葬其地在南京德安門外卷阿之原孫七某某銘曰顧出貴州內徙南服系分小宗世封大國公躬弗承公則子公祖有蔭公凡有祀賜弓授鉞曰子斯才公躬弗逢以貽後來龍章鳳函天子有誥公躬弗沾沒饗其報亦有母德實婉實延公澤弗諼沒則有年舊都有原曰有世墓公歸實全夫夫婦婦公子既貴公孫後蕃公德有徵其在公門

明故資善大夫禮部尚書贈太子太保謚大穆
傅公墓誌銘

初公以足疾在告上遣醫診視兼賜蔬米羊酒諸物乞
辭印不許請停俸亦不許凡值時節朝賀奏表箋方物
請不署名亦不許久之再乞休致上若曰卿學行端慎
才望著聞方切倚任宜善調攝以副眷懷甚勿固辭比
訃聞上震悼諭所司曰瀚侍朕講學久可特贈太子太
保謚大穆仍遣官加祭給驛護喪治葬事賜寶鏹萬貫

為賻蓋聖天子篤念舊學于賢且勞者尤厚近倪文毅公及公卹典皆憂出常格倪公之卒天下共慟之而公復繼踵以沒予與公同年交最厚方與公經紀倪公後事不謂其遽至此既銘倪公忍不為公銘耶公姓傅氏瀚其諱也字曰川以府學生舉天順己卯鄉薦登甲申進士第入翰林為庶吉士成化乙酉丁內外艱歸戊戌授檢討己丑奉命教內館憲廟見古帖隻字百餘函走中使令公編次公為韻二律頃刻而就乙未同考禮部

校閱精確得今吏部侍郎王公鑒為省元丙申侍經筵
丁酉秩滿遷修撰戊戌兼司經局校書東宮講讀丙午
秩再滿遷左春坊左諭德兼檢討充講官考順天府鄉
試其解元則今羅編修玘也丁未奉命教庶吉士業以
今上登極恩擢太常寺少卿兼侍講弘治戊申親耕籍
田幸太學皆以職事從太廟祧祫皆預議進直日講儀
度雍雅詞義懇到上每為注聽焉辛亥憲廟實錄成以
纂修功進太常卿兼侍讀學士壬子掌院事乞歸省墓

命馳驛亟還特賜寶鏹銀幣祭丑再教吉士擢禮部右侍郎時倪公為尚書公寅恭奉職並稱為賢丙辰皇太子冠諸王婚及郊廟諸祀事多所贊相轉左侍郎請限度僧道減十七八己未知禮部貢舉嚴為範防中更變故卒不失正時東宮出閣講學朝廷方慎簡官僚公用廷薦兼學士掌詹事府事仍值日講適修大明會典統副統裁官庚申拜尚書掌部事時保定有獻白鴉者公言祥瑞不當奏斥遣之陝西守臣得玉璽乞頒示天下

公歷考傳記形制篆刻皆不合且言我朝自有璽可傳萬世無所事此乃寢不行他如修政弭災諸疏剴切不阿多類此尤勤政務每力疾視事屬續前一日猶削祠祭稿心計手畫必求其當乃已蓋其性然也傅氏本出吾長沙之湘潭唐末徙臨江之清江宋南渡再徙新喻曾祖諱原顯鄉稱為樂全處士祖諱汝器考諱邦本皆贈通議大夫禮部右侍郎祖妣劉氏妣簡氏皆贈淑人配李氏繼胡氏並有內行贈封皆淑人子二長元以蔭

補國學生舉順天府鄉貢文行有父風次完以蔭肄中書舍人孫一選府學生曾孫二公生某月日卒某月日年六十八歲是年某月某日葬于某山之原李淑人祔公清眸豐頷神采益發孝誠終慕仲弟曰茂李潮皆所教育潮繼舉進士累官工部郎中卒于南畿公間訃驚蹶足遂增劇李淑人病不置膝妾卒不議繼者數年故人貧病必加賑卹死為棺殮歸其喪與人交儀必過厚值所傾信終身不二間有善則樂道之其識量弘裕尤

人所不易及者博學強記為詩文峻整有格書法亦道
美為時所重有體齋集若干卷藏于家其遺事見王吏
部所著狀者不具載銘曰古秩宗職惟清且寅國朝多
賢公哉其人公身不污中自檢擢非法勿動繩循矩度
戕冠垂紳夙夜在公一事弗終我心忡忡操是三者其
所受職匪公弗戕公弗我克世有負乘率為寇毆公慎
厥居綽乃有餘納忠閑邪公在講幄發潛誅諛公在史
局翰林儲才如古宅俊公其人哉周有攸蘊生才實難

其始自天有才弗終抑又誰愆人之存亡惟國攸係我
銘非私以永公世

明故資政大夫南京刑部尚書贈太子少保翟
公墓誌銘

今之三法司各有職洛陽翟公歷兩京為御史為寺丞
為都御史以至尚書徧居而歷試前後三四十子所
及見指不能數屈可謂賢且勞矣公既卒天子念其勞
遣禮官諭祭工部營葬事特贈為太子少保益亦卹之

加一等云公諱宣字廷瑞成化癸巳為浙江道監察御史巡禁城及通州倉及濟寧以南河道所至有聲接應天徽州諸府至寧國廉知有二豪虐醵甚熾有司庇之莫敢發公事竣且去忽厲聲曰吾若再至倉陳兒不毀倉評小官不拆船罪且死府縣皆連坐衆相顧駭愕于是二豪者皆屏跡後復業改行焉改山東道掌道事兼總諸道奏牘名益起甲辰監吏部會試綜理有法尋擢南京大理左寺丞詳駁惟允丁未擢都察院右僉都御

史巡撫山西兼督鴈門諸關內輯外捍務勤夙夜逆賊
王良李鉞潛遣人出境搆敵患且作公馳至忻州道阻
賊衆即督官兵擒之或請報捷公慮及無辜執不可以
常奏上降勅獎勵加俸一級邊儲折銀民因輸納多流
徙失業公奏減大半歸者相屬弘治辛亥遷右副都御
史入理院事慎不失體陳卹刑革弊數條上以其深切
時務多賜採納丙辰進右都御史庚申遷刑部尚書皆
在南京寬嚴中適每斷大獄必審覆未嘗苟決人皆以

長者稱之間疾作具疏乞休上若曰瑄老成練達力精未衰宜善調攝以副委任後再具未上而卒蓋其履歷之大者如此公初以經學名累舉得進士為奉化知縣數年以政績被徵雖公若晚達竟臻顯用公弟瑛舉進士官至南京大常寺卿贈及二代公獨歎其未伸本報後以都御史貴贈其祖考妣而下扶顧加重君子稱為孝而平居承志致養友弟訓子念舊故卹孤獨諸凡義舉皆餘事也公先世居鹿邑元季始遷洛陽以醫名者

九世曾祖伯嘗為醫官祖壘國朝永樂間徵至南都因家焉考諱觀被選為皇太孫伴讀後為太醫院御醫供奉內局醫不責報有德在人配潘氏封夫人賢而克相子五鑾銓銳鑑鉉銓繼舉進士為大理右寺副鑒以蔭為國子生孫五公生某月日卒某月某日塋聚寶門外某鄉之原予與公同舉天順甲申進士又與瑛舉于鄉知公度量弘裕蒞事詳慎謙厚不伐壯老如一日稔其賢遙哭其喪又感銓之踵武繼志力圖不朽其孝亦可

嘉也乃按狀為公銘公著有靜菴庭訓藏于家其為
縣民有去思之碑其省墓大夫士有瑞芝連理之詠
傳于時皆不及載乃銘之曰公出中原生帝鄉身長
六尺偉且強壯年角俊千人場分符百里一海邦入
道枳棘棲鸞凰乘驄冠豸何軒揚殿前正笏聲琅
琅手持三尺無低昂坐遣秋殺回春陽出秉憲節巡
藩疆束縛狗鼠驅犬羊北臺南省戕穹蒼星軺霧蓋
隨翺翔聖明在位治具張公輩分曹居廟堂公才恢

廓氣渾龐少淹若負老則償彼造物者非茫茫有弟先
貴子後昌一門四世貤封章高原賜塚兩相望後千百
年此其藏

明故贈通政使司左通政王公合葬墓誌銘

贈通政司使左通政王公封太夫人張氏皆以子敞貴
被錫公之卒也敞方為諸生及舉進士為給事中為叅
議皆獲以本官贈父而母以太孺人進封太宜人凡五
品封者四品制不封敞援近制乞移其所得誥于是公

贈今官階至中憲大夫而太恭人封焉公權厝久敞既貴乃塋于東山崇禮鄉之原暨而太恭人以壽終朝廷遣官諭祭恩禮加重敞將歸合塋念公銘表未備請并為銘以納諸幽蓋公卒十有七年而後克塋又十有六年而後克合其緩也若有所待云公諱忠字以誠陝之西安人也祖諱國祥考諱寧洪武初徙居南京占籍錦衣衛公少習經史大義尤工楷法素孝友父喪終慕奉母甚謹性好施值隣族貧者或傾囊給之公極意承順

畧無靳色母安其養年至八十有七而卒兄疾草公問
所欲曰吾生不能給汝今且死敢以兒女望汝乎公泣
曰吾兄之子猶子也某不敢負後撫其子政及二女皆
為婚嫁有二姊一嫁于林氏家中哀衣食殯殮皆其手
出一嫁葉氏早寡并育其子于家戚黨俞教諭春有遺
孤亦留為娶婦一門三姓同爨而居人以為難公性本
嚴毅不苟合而厚倫尚義乃如此初事舉業奪于家政
則以付敞曰汝為我成之忽遘疾卒時成化己丑閏二

月二十三日年五十有二而已娶袁氏甫期而卒繼娶于張是為太恭人夙閑禮度奉姑外不敢與姒齒居恒以儉勤佐家公甚賴之公卒二甥者皆去太恭人獨專閭政慈勤撫下老不自佚少子敬早逝教敝尤切敝自有祿秩迎養京邸十有餘年太恭人每夜五鼓輒起使入朝與二三隣嫗談笑為樂比其婿葉森為京衛武學訓導歲時燕會於婿婦女舉觴稱壽太恭人年益高而動履裕怡然若居其鄉大夫士登堂而拜者相與談羨

至為歌詩頌之年八十有三而卒是為弘治壬戌年四月二十有七日其塋以某月某日孫二某某嗚呼王氏再世失怙而母皆老壽以成其子之賢至是尤顯然其培植之厚儀型之正於公之德不亦益可驗哉敞之舉于鄉予實典試事見其居官雅飾而有文其奉母婉孌非公事未嘗去左右嘉其孝銘不復辭狀出翰林學士王公德輝德輝敞同年進士稔聞內教又稱康修撰海之先與有世契海就試必寓其家館穀慰藉曲被恩意

其道母之德尤詳并據以銘乃為之銘曰有封若堂隆
外虛中繼封君之藏合寔其旁載飾以崇繼太恭人之
光揚名亢宗越有令子身所委祉庶其在是維恭人之
教繼君之志生養死葬子職是敦死贈生封維天子之
恩維大史有銘君與恭人其永存

南京國子監監丞贈翰林院編修文林郎濮君
墓誌銘

君姓濮氏諱琰字延方其先居太平當塗之王濮村蓋

與王氏並望故其稱云爾世業醫曾祖貞祖觀皆供事
大醫院考鏞正統間被召進藥有奇驗後歷秀吉二王
府良醫致仕歸君生有異質知孝義良醫公謂之曰醫
非通儒書弗精矧醫利物有限而儒之用不窮成吾志
者必汝也乃以家政屬長子琳遣君就學君兩藝並進
尤邃經術甫弱冠聲動都邑累試京闈弗利成化癸卯
始得舉再上禮部中乙科丁未授曹州學正條教精密
士經指授得科第者視昔加多弘治丙辰九載考最陟

萊州府學教授如在曹州自己酉至戊午歷典福建山西浙江河南鄉試事凡所校閱人無異議用薦擢國子監助教檢身率物雖生徒贄物亦屏弗納祭酒謝方石先生而下雅重之壬戌擢南京國子監監丞既至旬日疽發背遽卒十月十有一日也年五十有九子韶為翰林院編修值需令得推恩時君在官例不封至是韶以封請朝廷贈君如其官階文林郎而君不及見矣君配鄒氏常德府學訓導某之女子韶以解元舉進士為庶

吉士擢今官次訛孫一訓戊午之詔令巡撫巡按官薦天下學識有才行者予之京秩顧又弗薦薦者皆僅得國學而止論者謂奉行之未至以為憾君再遷地雖遠職稍加重若可以少信前出者而不獲一試以沒又將誰咎乎然君之教成其子之名而卒饗其貴其後尚未可量固在茲哉韶奔喪歸卜以癸卯某月某日葬君于某山之原奉顧編修士廉狀介吾甥貢士崔傑請予銘予亦舊嘗識君乃為作銘銘曰觀教人者必于其子匪

弗能遠教所攸始言有易教以弗率故苟其率之奚必
外傳吁嗟濮君是子是父身弗自取于子斯昇子報父
德行業是似吁嗟濮君是父是子君名弗哀君教在
此

明故福建布政司使左布政使李公墓誌銘

公姓李氏諱琮字義方其先處之景寧人也祖諱信籍
錦衣衛校尉考諱貴授官為百戶公生京師天順壬午
年舉鄉貢甲申登進士第成化丙戌授南京吏部主事

丁亥署郎中丁酉改南京刑部壬寅擢知平陽府庚戌
擢湖廣布政司左叅議癸丑擢山西按察使戊午擢福
建左布政使辛酉閏七月十九日卒于官年六十其子
扶柩歸癸丑三月十七日塋于都城東茨渠之原其配
封宜人石氏先塋至是乃克合石生一子欽側室呂氏
生三子鉉鉞鉦公為人簡默易恬無疾言遽色事繼母
以孝聞居官勤慎在吏部已習律法在刑部有丘司務
者坐贓當罷孫千戶坐殺人當死廉其枉皆辨出之在

山西斷決尤多在福建值歲饑極力拯救民甚安之其
在乎陽饑甚人相食計口發粟多所全活城中乏水公
引洪洞水入城以省汲費又溉田數十頃垣曲盜作聚
一千餘人拒殺官兵勢甚熾衆議欲進勦公告于都御
史葉公淇曰民苦饑耳請撫之乃携從者五六人冒雪
以往賊迎見曰是李府尊也遂下山羅拜擁入寨中公
召其酋六十餘人諭以利害皆感泣聽命事遂定比去
民涕下不忍釋至繪其像事之在湖廣施州夷殺其土

官因作亂公調兵五千擣之擒賊之首三十還所擄男婦二千人追所掠印五顆朝廷錄其功賜綵幣楮鏹者再此二事尤勇決奇偉出常恒遠甚而公退讓不伐人鮮克知之故資序累滯凡四十年而僅至牧伯竟不入朝遽以沒即是以觀則卑官僻地之在天下者雖有奇功異績孰從知之亦孰能舉而用之顧可勝嘆哉公塋既卜監察御史費君鎧淵父也為狀公行公弟禮部主事璋暨欽請予銘予既哭公于位乃為銘而先序其事

于其奇者特詳焉銘曰賓于鄉策于廷我與子同名敝
于外居于中子名弗我同少為刑官老為藩侯維其政
之優生而榮行死而全歸維孝其無虧生于斯邦葬于
斯原維予文其永無刊

岳孺人周氏墓誌銘

我外舅蒙泉岳翁有二室周孺人者後翁三十三年年
七十三而卒是惟弘治癸亥二月二十五日翁無子宋
夫人子亦久逝孺人嘗生一子曰祖授五歲而夭二女

一適監察御史李經夫婦皆早世一適尚寶司卿李珙孺人常依其女以居起居出入更相為命越三十餘年病且篤翁從子坪迺之歸珙留弗釋坪遣其子梁日再至孺人幡然曰歸葬于家禮也乃強舁蓋至家一日而屬纊時伯姒陸孺人年九十哭之甚哀曰周氏有孝行不可使遂泯吾見士大夫家女婦死則有銘盍圖之于坪及珙奉狀請于予予于岳事聞之稔矣自吾妻之亡惟孺人母子在感念今昔為之愴然以悲初翁

為翰林編修孺人實歸于岳以佐宋夫人饋事翁自翰
內閣為權勢所構謫甘肅宋夫人以法從戍太夫人又
老且病孺人與陸孺人侍湯藥親為扶掖頃刻不離側
雖穢器亦手自浣拭紉績盡廢身無完衣太夫人感之
病且革口授遺教數百言大半皆孺人事令其孫婿庶
吉士王璵書之以貽翁翁延母德所謂哭訃闕內受遺
柩前者也嗟夫婦人之德視所從而能化斯可以為善
汎觀博訪固不難乎其人翁之盛德大節著在天下無

容議矣予見孺人與語和色如恐傷人宋夫人晚歲同寡每引而與並席禮均兄弟亦必有感之深者故家風範宛然在目而人事之凋落乃爾悲夫翁墓在順天之漷縣其地曰岳家窪宋夫人已合塋今孺人亦祔是歲三月十八日窆焉銘曰蒙岳之封有名無窮維千萬年孺人其永從之

懷麓堂集卷八十五